

固安縣志卷之五

官師

名不可以虛作守官治民必有政迹其中仁暴污潔
賢否智愚數百年後士大夫皆能言之其近者山林
野老能指而目之舊志祀名宦凡十三人而未有傳
著何歟于清端公以下諸人俱顯官勲亦彪炳已祀
省會名宦祠何復設位固安而次縣令下歟今祇據
舊志所載知縣教諭八人各採軼事繫之其孫延長
一人則據畿輔通志補入凡九人此外得諸採訪者
別爲宦績表之若夫世遠年湮無有事蹟可紀者則

第列其姓名籍貫治河官員不與縣事列其駐邑境
者可也志官師

名宦

明

王宇字德周號溪山陝西西安衛人宏治壬子舉人初授四川仁壽令久著循聲丁憂去官服闋知固安縣興學愛民不尙繁苛嘗慕龔黃卓魯之爲人因構亭於廨圃匾曰希四以章志也縣舊無城公請築焉後入判順天府祀名宦

蘇繼嘉靖中由進士知固安縣蠶城有功陞刑部主事祀名宦

馮子履山東臨朐人隆慶二年由進士令固安修學官後

陞兵備道祀名宦

梅國楨湖廣麻城人萬厯十一年由進士知縣事爲政闊
畧簡易務得民心中官操豚蹄爲餉請徵債於民國楨
曰今日爲君了此急牒兵至趣令鬻妻償貴人債而僞
遣人持金買民妻追與偕入民夫婦不知也哀慟死訣
中官亦感動毀券而去在任間與材武較射有蝗不入
境之異崇祀名宦

孫延長山東禹城人萬厯中由進士知固安縣值大雨渾
河溢士民爭竄匿延長毅然不動率丁夫負薪伐木日
夜修築水不入城民戶祝之

黃奇遇字亨臣廣東揭陽人崇禎戊辰進士四年令固安
前令秦士奇以任事過銳被譴人人疑畏上以邊才借
奇遇奇遇毅然任之履任後懲前飭後一意拊循大率
嚴於奸猾而寬於良善縣尉職原以捕盜安民積習相
沿其胥役每月科斂村民安爲常例甚且誣盜挾奸視
爲利藪奇遇稔知憤久之欲力剪除會有投堂告虎役
者遂借此盡發宿癰搜剔無遺上自直指疏糾坐法申
文鐫石歡聲雷動其守城諸大功更不可沒祀名宦

楊東山河南祥符舉人嘉靖四年任固安教諭嘗建射圃
有觀德亭中度豐解乏笙鹿中布侯弓矢決拾之屬悉

合古制後陞直隸饒陽縣知縣祀名宦

韓埰山西蒲州人由舉人任固安教諭祀名宦

國朝

朱國治字平寰撫順人順治四年由貢生知固安縣興文
養士革弊甦民去任士民思之後陞雲南巡撫祀名宦

宦績

周

李牧廣平人秦王政三年爲趙將使攻燕拔其城卽守備
於此

金

王競字無競金天眷時爲固安令博學能文工草隸書

金史

張定遠金正隆時爲固安令有護國福民之心政治稱善

舊志

成奉先金大定十年世宗如霸州冬獵謂大臣曰比因巡
獵聞固安令高昌裔不職已令罷之霸州司侯成奉先

奉職謹恪可進一階除固安令

金史

溫迪罕達字子達蓋州人金明昌時任縣主簿性敦厚寡言

笑以憂去官仕至集慶運節度使

金史

李霆寶坻縣人粗知書善騎射輕財好施員祐左遷兩官
與弟雲率眾數千巡邏於此充義兵都統累立功遷防
禦使賜姓完顏後爲京兆安撫使

元

石抹明安攻拔本縣歲己卯詔以黑軍分屯於此初石抹
阿辛所將軍皆猛士衣黑爲號故曰黑軍

馬塔刺海溫元大德時監固安郡清心飭躬以治以敬

元史

劉德寬元至元間知固安州闢異端興學校大得民心
高淵字巨川大都人元大德間知固安州勤勞政事創立
講堂士皆從而肄業焉

韓元亨元大德間任教諭講學明道振起斯文

劉蒙亨元泰定間任教諭談經設教士依歸焉

薛世昌元泰定間由國子監簿陞固安州政教兼舉士民
仰戴後徵爲太史院經歷

王鈞字子衡元泰定間知固安州爲政大本以學校爲先
務士民咸仰賴之

劉之紀字綱甫永清人元大德間任固安州同知政刑清

簡吏民畏服

石抹孛迭兒元時契丹人徙霸州歲辛巳陞爲龍虎衛上將軍霸州等路元帥佩金虎符以黑軍鎮守本處水寨旣至令兵士屯田且耕且戰披荆棘立廬舍數年之間城市悉完爲燕京外蔽

不里刺元至元三年命將所統本統質子軍自益都徙還故地

王度任固安州同知恪勤奉公修舊起廢興學勵士

明

劉敬通許縣人監生明宣德七年知縣事平易近民爲政

尙簡勸農桑修廢墜有屯軍肆暴以法繩之後禦寇築隄反得效力民賴以安

王瑛鄆陵人宣德間任縣丞以廉能稱建倉築隄經久彌固

王演直隸徐州舉人宣德時訓導沈毅勤教

黃彥清績溪縣舉人訓導嚴正訓誨

李鐸舞陽人監生正統間知縣事敦厚守己和平近民不避權要罔顧身家後以誑誤去官

袁應絢鄆縣人監生正統間知縣事公勤廉謹臨政有方深得民心

原勵山西遼州人監生正統三年任主簿博通子史居官廉勤勸勉多士撫字小民

陳遜直隸蘇州府舉人正統初任教諭學問該博考課功勤生徒多所成就

張貞河南安陽人正統初由舉人任教諭立心勤慎教人不倦

高仲舉甯陽人監生正統間任縣丞政尙平易雅重斯文李端字宗政湖廣興甯人乙丑進士天順四年宰固安果斷剛明才善應變慨然以循良自任下車詢民疾苦恤貧寡均徭役興學育才旌賢抑惡期年四境稱治年穀

豐稔乃興學校葺廡署築隄防百廢具舉屯堡軍士有刁悍者捕至繩以法民皆安堵鄰境聞其名有越訴者後陞灤州守士民臥轍泣送之立去思碑

黃誠江西新喻縣舉人天順時訓導純正啟迪

榮瓚山東堂邑舉人成化間任固安縣剛明練達吏民興懷政平訟理且有禮賢下士風

王政成化初由舉人任固安訓導勤學問嚴教規

賈貴夏縣監生成化間任縣丞興學舉廢後陞本縣知縣

周同軌直隸華亭監生成化間任縣丞廉勤和易

王綱銅陵人由監生任訓導勤於訓誨

郁珍字君聘號易菴江浦縣人成化間由舉人任教諭窮經博學善誨生徒每日清晨升堂課諸生背誦經史早饌畢集諸生於講堂量資稟學力授以經史題目悉與講明義理令作科舉文字午後復集諸生爲講明經史次日令復講而課其勤惰每月一試而殿最之以示勸懲五六年率以爲常未嘗少倦然猶敬祀事重鄉飲抑浮屠舉喪禮凡有關於禮教者皆竭力爲之固邑人才由是日盛秩滿陞國子監助教

張袞鳳陽縣舉人正德間令固安性純恪歲旱禱雨輒應何永慶字善夫嘉靖中令固安始纂邑志修文廟

常道立江西高安人萬厯中由進士知縣事在任端簡不事粉飾民不爲擾人稱長者

黃和沂州人萬厯中由進士知縣事渾厚精明遇事若緩而卒無不確

陳陞夏邑人萬厯中由進士知縣事風雅恬靜事皆立決民用不擾

孫織錦字伯開許州人由進士知固安縣萬厯四十五年

旱饑民將爲亂煎粥以活之

修文廟儒學邑紳郭光復爲之記

田生芝麻城人萬厯間由進士令固安長厚廉靜訟至能以德化後調密雲民爲之祠

胡其俊孝感人萬厯中由進士知縣事精明果決人望而畏之築去思碑

李士元金鄉人由進士天啟二年知固安縣清恬鎮重民帖然依之

王之鼎三源人由舉人天啟五年令固安和煦春溫自蒞任至宦成無一難爲百姓者

劉伸麻城人天啟戊辰進士崇禎二年八月知縣事甫三月突遭萬騎攻城伸躬率士民登埤堅拒內無守兵外無應援有劣生布言經過郡邑所至受降誘以順免伸嚙指厲罵同生員張國銘等誓以死守矢石亂下擊死

二人獲馬二匹餘退舍三次越兩日夜矢盡力窮而敵
撤良鄉老營齊來聲東擊西人心潰亂伸知勢難支猶
從容密囑吏胥速埋藏庫金局錮倉穀而自藏印於身
城陷被射傷一膊墮臥亂屍中懨懨餘息家屬被殺大
半及敵退眾旋城下伸猶勉起抱印嚴擊邑中焚搶兇
黨人心始定後經內外法司屢訊士民莫不涕零幸蒙
明旨有完庫守印家慘身傷原情矜憫云云

秦士奇字公庸金鄉人天啟乙丑進士初任崑山縣以魏
璫造祠託疾封印半載始允歸崇禎二年補獲鹿縣三
年二月調本縣星夜赴任招集殘黎掩骼埋胔更法嚴